

28 AUG 1997

Merdeka-Sambutan

NAMA BENDERA MALAYSIA DIISYTIHAR MALAM AHAD INI

KUALA LUMPUR, 28 Ogos (Bernama) -- Bendera Malaysia akan mempunyai nama khas menjelang detik 12 tengah malam Sabtu ini setelah 40 tahun menjadi simbol kebanggaan rakyat Malaysia sejak 31 Ogos 1957.

Perdana Menteri Datuk Seri Dr Mahathir Mohamad akan mengisytiharkan nama itu ketika menyampaikan ucapan pada pukul 11.54 malam di Dataran Merdeka di sini, demikian menurut kenyataan Kementerian Kebudayaan, Kesenian dan Pelancongan yang diedarkan Jabatan Penerangan hari ini.

Sebelum itu, Dr Mahathir dijadualkan menerima bendera negara daripada peserta acara-acara Larian Bendera, Larian Obor Patriotik dan Motorthon.

Tepat 12 tengah malam, orang ramai di Dataran Merdeka akan melaungkan "Merdeka" dan bendera negara dikibarkan disusuli pertunjukan bunga api.

Acara-acara itu merupakan kemuncak sambutan Kemerdekaan malam itu.

Menurut kenyataan itu, persembahan "Di Ambang Merdeka" tahun ini akan membuka tirai Hari Kemerdekaan ke-40 dengan pelbagai persembahan menarik bermula 8.30 malam.

Persembahan anjuran Kementerian Kebudayaan, Kesenian dan Pelancongan itu terbahagi kepada dua bahagian berkonsepkan diari Merdeka dari pukul 8.45 malam hingga 10.55 malam dan dari 11 malam hingga 11.50 malam.

Persembahan pertama ialah dokumentari, Diari Merdeka, persembahan khas oleh tentera laut, tentera darat dan Pasukan Simpanan Persekutuan (FRU), Diari Nusantara, Tetamu Kemerdekaan dan nyanyian artis tempatan termasuk Siti Nurhaliza, Zainal Abidin dan Datuk S.M Salim.

Persembahan kedua pula termasuk drama tari, lawak jenaka, persembahan kesenian tradisional seperti mak yong, wayang kulit dan dikir barat.

Dr Mahathir dan timbalannya Datuk Seri Anwar Ibrahim beserta isteri masing-masing menjadi tetamu khas pada malam itu.

Beberapa acara lain turut dianjurkan sempena sambutan Kemerdekaan termasuk pertunjukan belon udara panas di Dataran Merdeka dari pukul 4 petang hingga 9 malam Ahad, bola sepak jalanan, kapal terbang kawalan jauh dan pertandingan memancing di Taman Tasik Titiwangsa pada pagi 1 Sept. --
BERNAMA

MNY NN AHH